

資料來源：

## 111 年全國語文競賽客家語朗讀文章高中學生組（四縣腔）

### 編號 1 號

#### 【暗晡頭个海脣】彭瑞珠原作

暗晡頭个海脣，無麼个人，天頂个月光，畏羞个囡在雲背；  
拘禮个海風，驚生份个吹一陣又恬一陣，出海口个海浪，慢板慢  
板仔在該激啊激欸<sup>1</sup>。無人出入地个魚市場裡肚，就單淨留等，幾  
葩仔<sup>2</sup>孤栖个電火，還過，幾臺仔推啊推欸<sup>3</sup>个抽風機。

魚市場外背闊闊个停車場這片，犖花犖花仔<sup>4</sup>停等幾臺个自用  
仔。還毋想睡个駛車仔人，有人帶等罐頭來餵流浪狗，也有人帶  
等釣枱仔來湊月光釣魚仔。魚市場該片遠遠个停車場邊脣，幾下  
個越夜越有元氣个後生人，載等掛有大喇叭个音響，同車後斗撒  
向天、三臺車仔比比企，在該咚滋咚滋<sup>5</sup>尋月光共下跳舞。

右手片个音樂聲撓到吾腳底癢癢，毋過，左手片騎等過个兩  
臺奧多拜，錫著吾个目光。僮跔等佢兜个身影，行上兩百八十公  
尺長个笨鯊橋，想去看啊，掛等頭燈个兩個網魚人，係愛網麼个  
魚仔？月光也勾頭出來地，一浪一浪仔个水紋，在月光下看到清

清楚楚，一張魚網、兩個網魚人，落網、收網，撈起來个係一網  
个月光。雖然，連魚屎仔都無，毋過，佢兜還係有講有笑，僮  
想，佢兜怕係為著愛打嘴鼓來个，網魚仔，單淨係兩同年想在月  
光下共下寮个理由定定。

橋下个河壩水，也認同吾个想法「係啊，係啊！」緊應緊大  
聲，僮緊聽緊生趣。毋過，同佢看真來，該「係啊，係啊！」个  
聲說，怕係河壩水分海浪打轉來，抑係海浪激上河壩水个聲啊！

毋多知仔，就分僮行過笨鯊橋地。橋這片，日時頭分人箭到  
穀穀个自行車，這下通棚一列列仔企好、企正，在月光下恬靜。  
光華華个路燈下，無人上下地，就單淨看著一隻揸等螺殼个毛  
蟹，對白沙堆勾頭出來又囡倒轉去，對路脣趟過來又趟倒轉去，  
自家在月光下搞囡人尋。僮企在路脣，看毛蟹、看流流流流个河  
壩水，在共樣个月光下，已像分僮看著地，頭擺，該一大陣笨鯊  
入港時，客家打漁人佢兜面頂个笑容。

<sup>1</sup> 激啊激欸：音 gieb a gieb e\；液體來回晃動貌。

<sup>2</sup> 幾葩仔：音 gi\ pa\ e\；幾盞。

<sup>3</sup> 推啊推欸：音 kog a kog e\；此為形容機器轉動的聲音和狀態。

<sup>4</sup> 犖花犖花仔：音 lo fa\ lo fa\ e\；稀疏間雜著其他花色的樣子。

<sup>5</sup> 咚滋咚滋：音 dung\ zii\ dung\ zii\；形容電子音樂的節奏聲。

資料來源：

## 111 年全國語文競賽客家語朗讀文章高中學生組（四縣腔）

### 編號 3 號

#### 【芋荷葉个智慧】謝錦綉原作

這幾年長透會在報紙、電視新聞看著，魚仔肚屎留等各種个塑膠絡仔。

現下因為塑膠絡仔便宜又利便，毋管燒个、冷个、冰个，總下用塑膠絡仔裝，無論上山下海，大隻細隻，用過就挑忒<sup>1</sup>，大家慣勢恁樣無限制个使用塑膠絡仔。

三不二時看著新聞報導，海鯪死在海脣，研究人員切開厥肚屎，發現海鯪毋係發病死个，係因為食忒多人類擲在大海裡肚个塑膠絡仔，佢無法度消化正死忒个。海鯪歸身仔塑膠粒仔个毒性，其他个海魚也共樣有，人又捉魚仔來食，這毒性又轉到人類本身來。結果就恁樣輪迴，魚仔源頭減少，大環境污染，人類自家也係大食物鏈其中之一，健康當然大受影響。

今年正月年過忒，僱對嘉義上來臺北寮一兩個月；吾姊戴新店山頂，有所在好種菜，逐擺有菜好摘，佢就坐車仔拿來分僱。

第一擺拿著佢用紙絡仔裝等个青菜，僱先放冰箱，等到愛煮个時節，正打開紙絡仔來看，啊哦！正知紙絡仔裡肚還用三層芋

荷葉包等，毋係用塑膠絡仔袋。僱就想：「阿姊啊，你正經跔毋著時代咧！這下還有麼儕用芋荷葉包東西？」僱暗暗在該笑阿姊。

無想著，先拿出一種菜食，旨食个菜用原本个芋荷葉包轉去，繼續放冰箱。過兩日菜食忒，去拿第二種菜个時節，打開芋荷葉，包在葉肚个青菜，還本本萋萋！到這下，僱正知芋荷葉恁好用。

這下个時勢，科技進步盡遽，大部分人總係認為新个發明較進步，舊換新，舊東西大家就挑忒。

毋過，毋管新抑舊，大家總愛想較長久、想較遠兜仔，該兜毋會綿、毋會歿个垃圾，緊留緊多，留到最尾，地球總會分垃圾搵忒<sup>2</sup>；到該央時，人無法度戴地球，後代子孫也毋知愛歇在哪个位正好？

芋荷葉毋單淨做得保存青菜、魚仔、肉，效果也比塑膠絡仔較好。東西食忒，摻芋荷葉挑忒，佢轉到泥肚，自然綿忒，就會變做肥料養分，全無打爽。芋荷葉無毒性，毋會污染環境，顛倒分地球淨俐，分人類康健，這係頭擺人个智慧，愛記得正好。

<sup>1</sup> 挑忒：音 tiau\ ted\；淘汰、丟棄。

<sup>2</sup> 搵忒：音 eb\ ted\；掩埋、埋藏。